

## Ministerio di Cultura a organisa sesionnan cu instancianan publico y priva

### Mester yega na un strategia integral pa cultura

**ORANJESTAD** - Durante dialuna y diamars, Ministerio di Cultura a organisa sesionnan cu instancianan gubernamental y priva tocante cultura.

Minister Otmar Oduber a bisa for di prome instante cu su vision ta pa tin un strategia integral pa cultura, pa tur partner ta riba e mesun liña y pa parternan comunica cu otro.

Indra Zaandam, consehera di Minister Otmar Oduber pa Cultura tabata encarga cu e sesionnan aki a indica cu e sesion cu e instancianan gubernamental tabata pa scuchanan prioridad y retonan cu nan tin. Esaki a bin despues di rondanan consultativo cu a tuma lugha aña pasa organisa pa Ministerio y Departamento di Cultura. A reuni dialuna pa mira si e retonan actual ta esunnan cu a wordo identifica aña pasa y por a ripara cu diferente di e actornan tabata contento di por a sinta hunto. Pa lora ta e sesion di diamars por bisa cu a haya perspectivanan sumamente interesante y importante di sector priva, a haya ideanan sumamente innovativo y nobo como tambe sugerencianan riba puntonan di mehoracion.

#### Maneho cultural

Idea ta pa bin cu un plan di maneho cultural, cual ta andando caba y esaki por wordo considera e di dos fase. Di e forma aki por bin cu algun punto di accion concreto di manera cu por sigui desaroya e sector cultural. Un di e entrepreneurs cu a participa den e sesion di diamars ta Tristan Every cu ta miembro di Co-Lab. El a indica cu cada un tin un definicion diferente di cultura y cu un di e puntonan cu a sali for di e discusion ta cu mester defini cultura un tiki mas pa por tin un miho comprendimento di esaki. Tambe el a bisa cu diferente idea clave a bin dilanti pa nan como sector priva yuda promove cultura y artistanan na Aruba.

Tristan Every, mirando su background como entrepreneur, e ta considera cu e por contribui cu cultura na Aruba dor di sostene nos artistanan local, cual por wordo haci riba diferente manera. A papia di crea un plataforma unda por pone riba agenda tur actividad cultural cu ta bay tin na Aruba, pero tambe dor di traha hunto cu e artis-

tanan den propio oficina, es decir, uza e oficina como un galeria di arte pa cierto artistanan of uza obranan di arte di artistanan local pa duna e oficina of espacio publico e toke autentico.

#### Just do it

Kawish Misier representando Young Entrepreneurship of Aruba a duna di conoce cu ta sumamente importante pa cuminsa bin hunto, den e

caso aki na Bestuurskantoor, pa cuminsa pensa riba kico ta e definicion di cultura y con ta bay promove nos cultura. El a indica cu ATA tabata un di e stakeholders presente y nan a bisa cu e turistanan cu ta bin Aruba kier un experiencia autentico, cu nan ta tin pa e producto local, pa nos cultura local, pa nos hendenan y cu si nos kier pa nos turistanan bin bek cada aña y papia bon di Aruba mester inverti den nos



mes, educa e mucha y hobenan riba kico ta pa ta un Arubiano. Tambe ta importante pa Sr. Misier pa wak con por engrandecé nos artesanonan y cuminsa pensa den forma di entrepreneur. Es decir, con ta exporta nos creatividad y nos

productonan.

El a indica cu hopi biaha ta reuni, ta papia hopi, pero no tin accion. Contrario na esaki, durante e sesionnan aki a keda palabra cu lo uza e slogan di Nike 'Just do it!', no ta cuestion di papia sino di haci. □